

Carera Teatral di Juby Naar

Durante otorgamento di Premio Nacional di Teatro 2006 na Sr. Juby Naar, prensa a ricibi un resumen di carera teatral di Sr. Juby Naar, cual ta sigui aki bao

For di mucha Juby tabata ocupa su mes cu teatro. Den verkennertij e tabata traha obra pa Hopman Jan Lobbrecht, pa cada celebracion di Arrowakken Groep y intercambianan cu scouting di Sero Colorado.

E prome obra tabata "Operacion den hospital" usando figuranan di sombra cu iluminacion.

Na school e tabata traha schetsnan riba Jan Klaasen y Katrien presenta den Cecilia Club pa actividadnan cultural escolar y pa actividadnan cultural di Lago Heights Club, e semper tabata tin schetsnan humoristico.

Frere Inocentius a encurashe pa skirbi obra fuera di e schetsnan y su prome obra di mey ora tabata "Freymento estilo bieu" cu el a presenta den Don Bosco Club cu St. Jans Knapen na fin di decada 50.

Despues el a forma e duo comico "Lollypops" cu Ruthilio Dorcas, y tabata duna presentacionnan rond di nos isla hunto, principalmente pariba di brug. E tempo ey nan tabata e rivalnan di e conocido "Wois Wois" di Teolindo Lopez. Nunca e dos gruponan aki a logra actua den e mes actividad.

Tabata tin un periodo cu Juby tabata inactivo riba tereno teatral, te cu el a ser pidi pa skirbi algun schets pa "Cabaret politico" cu tabata ser teni riba nos isla den decada 70 y comienzo di decada 80 y for di eynan, el a interesa atrobe pa sigui skirbi.

El a forma parti di organizacion di Festival Internacional di Teatro di Aruba, FITA y ta miembro di directiva tambe di Fundacion di Arte Teatral Arubano, "Fundarte" cu a tuma lugar di FITA.

E ta un di esnan cu a presencia casi tur obra teatral di Mascaruba for di su fundacion y for di e organizacion aki el a siña hopi tambe. Te awe e ta un colaborador di afo cu

Mascaruba.

Juby na 1984 a funda Studio 84, cu a presenta "Cabaret Picante" pa hopi aña, y despues el a traha riba obranan teatral cu toque politico y humoristico, manera "Buscando un homber honesto" y "Baha gobierno" entre otro.

Aña pasa den e siman di celebracion di Dia Internacional di Teatro, su obra di "Celular" a wordo presenta cu exito.

E tin varios obra skirbi, di cualnan tres ta comprometi pa e aña aki, "Invasion di Aruba", "Tres menos un ta Cero" y "Montecristo", y ta trahando actualmente riba otro cu e no duna nomber ainda, y tin ademas "E catibo Virginia" den tapara y no tin intencion di presente ainda.

Cu FITA, Juby a presencia tur workshop cu tabata ser teni cada aña di festival internacional di teatro di FITA y durante e ultimo aña di FITA, el a boga pa muchanan special di nos isla habri e festival, basa riba seminario cu el a sigui na Hapon na 2000 riba teatro di muchanan handicap, presenta pa delegacion di Australia.

FITA a duna O.K. y sin cu nan tabata sa mes con y cu kico e "Muchanan Special" di nos isla lo habri e festival cune.

Nan a presenta un obra di "Compa Nanzi" y a cosecha masha exito cerca e publico internacional den Cas di Cultura cu a keda encanta cu FITA a usa nos "hendenan special" pa demostra cu nan tambe por ta artista.

Juby a presenta den Festival di Teatro Infantil Internacional di Toyama, Hapon, den grupo di Carmen Herrera, Grupo Kibrahacha, na 1996.

E obra "E recompensa" a ser escogi entre mas di 600 obra pa representa Aruba. Den e obra aki, Juby a actua na Hapones y Ingles, algo cu nunca antes a ser haci den e festival, y aki ta sigui locual a ser skirbi di esaki den e buki di evaluacion di obranan:

E ta skirbi pa Istvan Pinczes, un director y dramaturgo hungaro cu ta ser considera como un di esnan mas grandi Europeo y cu ta conoci tambe na Aruba.

E ta bisa entre otro, di e pagina completo skirbi:

From "The Reward", Don (Onty Lopez) and Sabina (Mireya Simons) became the favourite figures of the young japanese audience.

The Japanese- English Monologue was an outstanding masterpiece of a well trained talented actor (Juby Naar). It was a rare example of how to create contact with the audience and how to built up a scene with the proper timing".

Cuatro aña despues Juby tabata na Hapon un biaha mas cu Grupo Kibrahacha, como Souffleur pa "Morenita" cu tambe a logra exito grandi den e festival infantil mundial di teatro y participa na workshopnan y seminario.

El a actua tambe na Aruba, Corsow y Bonaire cu Grupo Kibrahacha di Carmen Herrera cu "E Recompensa", "E herencia" y den obra relaciona cu "Embarazo hubenil".

Tambe el a presenta Cabaret Picante na Corsow.

Apesar di tur e conocimiento teatral, Juby a bay cursonan di FARPA bao direccion di Amy Lasten riba tereno di dirigi obra y skirbi obra. El a skirbi y dirigi "E Webo" basa riba descubrimiento di Aruba y viahe di Cristobal Colon, actua masha bon mes pa Enrique Jaccopucci, el a actua den obra di FARPA, "E naufragonan" cu tabata parti final di un di e cursonan cu docentenan di Hulanda.

El a sigui curso di skirbimento di obranan di teatro, organiza pa Mascaruba, cu e dramaturgo fama mexicano, Tomas Urutastegui y for di diferente buki y revista a amplia su conocimiento riba teatro.

Juby ta e promotor mas grandi di teatro di Aruba y ora di presentacionnan teatral, e tin su lugar special den Cas di Cultura, den skina patras, ta sconde, pa mira e obranan y despues skirbi su comentarionan riba nan. E tin un admiracion masha grandi



pa e empleadonan di Cas di Cultura cu e ta yama "mi elenco scondi". pasobra sin nan e no ta logra nada.

Di Mascaruba su elenco scondi ta "the people in black" cu ta ser considera internacionalmente como e mihor nan locual no ta conoci na Aruba.

Su actor idolo semper tabata y ainda ta Alcides "Chido" Quillotte

Actor y actriznan, dirigentenan di gruponan

teatral grandi y chiquito, di schoolnan y otro organizacionnan, semper ta busca conseho cerca Juby

prome cu nan presenta. Juby semper conoce obranan teatral prome cu nan wordo presenta na Aruba, ricibiendo e scriptnan di antemano pa lesa y duna opinion y recomendacion.

Juby semper ta cla pa yuda y e unico palabranan cu e no tin den su diccionario, ta e palabra "NO MI NO POR".

Juby Naar , ganador Premio Nacional di Teatro 2006

y nombra pa Unesco pa bira "Living Human Treasure" di Aruba



ORANJESTAD(AAN)—

Juby Naar, dialuna anochi durante celebracion nacional di Dia Mundial di Teatro, auspacia pa Ministerio di Cultura, Instituto di Cultura y Unesco Aruba, a wordo sorprende cu e Premio Nacional di Teatro 2006, un eleccion cu a tuma lugar entre teatristanan di nos isla, organizacionnan teatral, representantenan escolar di teatro entre otro. E nominadonan presenta durante e anochi aki tabata entre otro Amy Lasten, Carmen Herrera, Rose Marie Provence, Leo Tromp, Chido Quilotte, Percy Jeandor, Juby Naar, Oslin Boekhoudt entre otro, y a resulta cu mayoria di voto tabata pa Juby Naar cu a premio di e aña aki.

Na mes momento a keda anuncia cu Unesco Aruba, representa e anochi aki pa su secretario general Sr. Jimmy Oduber y president di e comision nacional di Unesco, Sra. Carla Zaandam, cu Sr. Juby Naar ta nombra como "Living Human Treasure" di Aruba, cual nombramento segun DIARIO tin entendi tin cu wordo ratifica pa gobierno di Aruba, pa Sr.



Naar bira e prome Arubiano pa logra e honor aki di Unesco. Minister di Cultura Sr. Ramon Lee cu tabata presente y a entrega e certificadonan corespondiente y e bunita trofeo, a laga sa na e momento di e anuncio cu "tur cos ta cla caba!" pa Juby bira e prome "Tesoro humano viviente" di Aruba, pa su logronan riba tereno cultural y folklorico,

, carnaval y teatro y pa su labornan como periodista. E anochi tabata hopi precioso cu presentacion masha colorido y bunita di studiantenan di arte. CKV di IPA bao direccion di Sr. Freddy Montoya, docente di teatro, cual a hiba como titulo "Un homenaje na Teatro". Tabata tin tambe presentacion den capiya di e obra "E cas di Bernarda Alba" adapta y dirigi pa Jarmin Acosta, obra conoci

mente di Federico Garcia Lorca. Tommy y su grupo cu musica di harpa, presentacion di baile di Grupo Dabaruyba cu Xiovanne "Poppy" Casiano, dramatizando e tumba di Harry Zimmerman, "Pan Bati", mientras cu grupo Talentonan di Cristo dirigi a Gregory Goedgedrag

tambe a presenta un cu pa e anochi aki. Diana Antonette a duna un bunita recitacion di "Un rayo di speranza" y Bernadina Growell cu Popocorn Dancers cu un baile. Di parti di staf y personal di DIARIO ta bay un felicitacion na colega Juby Naar cu e logro aki.